



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA
Dirección Xeral de Enerxía e Minas

galicia

CONVENIO DE COLABORACIÓN ENTRE A CONSELLERÍA DE ECONOMÍA, EMPREGO E INDUSTRIA E O CLÚSTER DO AUGA MINERAL E TERMAL DE GALICIA PARA LEVAR A CABO O PROXECTO DE CREACIÓN DA MARCA DE IDENTIDADE SECTORIAL PARA O AUGA MINERAL E TERMAL DE GALICIA E O DESENVOLVEMENTO DO PROXECTO "TERRAS DA AUGA".

En Santiago de Compostela, a 18 de maio do 2016

REUNIDOS

Dunha parte, Francisco Conde López, Conselleiro de Economía, Emprego e Industria, actuando en nome e representación da Xunta de Galicia, en virtude das facultades que lle confire o Acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, feito público mediante resolución do 8 de abril de 1991, da Consellería de Economía e Facenda (D.O.G. do 30 de abril de 1991).

Doutra parte, D. _____, con DNI _____; actuando en nome e representación da Asociación Clúster do Auga Mineral e Termal de Galicia, en virtude das facultades que lle confire o artigo 26 dos estatutos do Clúster; con CIF _____ e enderezo na _____.

As partes, dentro do marco dos principios de coordinación, colaboración e respecto mutuos,

EXPOÑEN

PRIMEIRO.- Que este convenio de colaboración formalízase ao abeiro do disposto na resolución de 8 de abril de 1991 pola que se fai público o acordo do Consello da Xunta de Galicia, de 27 de marzo de 1991, sobre convenios de cooperación con outros entes públicos e con particulares e no artigo 88 da Lei 30/1992, do 26 de novembro, do Réxime Xurídico das Administracións Públicas e do Procedemento Administrativo Común.

SEGUNDO.- Que de conformidade co disposto no artigo 25 da Lei 5/1997, do 7 de xuño, de regulación das augas minerais, termais, de manancial e balnearios da Comunidade Autónoma de Galicia, corresponde á Consellería competente en materia de Industria o exercicio da competencia en materia de augas minerais, termais, de manancial e balnearios, sen prexuízo das facultades que poidan corresponder aos órganos competentes en materia sanitaria e turística. Así, o Decreto 175/2015, de 3 de decembro, polo que se establece a estrutura orgánica da Consellería de Economía, Emprego e Industria, atribúe a esta, a través da Dirección Xeral de Enerxía e Minas, as funcións comprendidas dentro do ámbito de aplicación da devandita lei.



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

TERCEIRO.- Que o Clúster do Auga Mineral e Termal de Galicia, constituído con data 12 de xullo de 2011 ten, tal e como se determina no artigo 5º dos seus estatutos, entre os seus obxectivos "identificar oportunidades de colaboración en todos os ámbitos empresariais, impulsando iniciativas rexionais, nacionais e internacionais para posicionar ás empresas das actividades nucleares do Clúster en mercados e referencia" e "favorecer a imaxe de calidade, sustentabilidade e innovación do recurso auga mineral e termal de Galicia, así como incorporar as mellores prácticas empresariais".

CUARTO.- Que Galicia é unha das rexións europeas con maior riqueza en augas minerais e termais e, en consecuencia, con maior tradición no seu uso como augas de bebida envasada e en balnearios.

QUINTO.- Que a Xunta de Galicia en xeral e a Consellería de Economía, Emprego e Industria en particular, están comprometidas co desenvolvemento e potenciación do sector das augas minerais de Galicia, por canto estas constitúen un recurso endógeno non susceptible de deslocalización, cuxo aproveitamento constitúe un potente instrumento de reequilibrio territorial.

SEXTO.- Que a tal fin, na Lei 12/2015, do 24 de decembro, de orzamentos xerais da Comunidade Autónoma de Galicia para o ano 2016, figura a aplicación orzamentaria 09.20.734A -781.4 "Clúster da Auga. Creación marca "Auga Mineral de Galicia", para o desenvolvemento do presente Convenio.

Dada a converxencia de ámbitos de actuación e o mutuo interese en xuntar esforzos na consecución duns fins que son comúns, as partes asinantes, en virtude da representación coa que interveñen, acordan a subscripción do presente convenio, de acordo coas seguintes

CLÁUSULAS

PRIMEIRA.- OBXECTO DO CONVENIO.

O obxecto do presente convenio é regular a colaboración entre a Consellería de Economía, Emprego e Industria e a Asociación Clúster do Auga Mineral e Termal de Galicia (en diante O Clúster) para:

1º) Creación, desenvolvemento e implantación dunha marca distintiva das augas minerais de Galicia ao obxecto de diferenciar e poñer en valor este recurso.

2º) Desenvolvemento no sistema operativo Android e actualización nas contornas iOS e web da ferramenta "Terras da Auga", para a divulgación, xeorreferenciación e xeolocalización dos dereitos mineiros da sección B e os perímetros de protección dos acuíferos de augas minerais en Galicia.

SEGUNDA.- XUSTIFICACIÓN DA DIFICULTADE DA CONVOCATORIA PÚBLICA.

As actuacións obxecto deste convenio son de interese xeral por canto o seu desenvolvemento supón a posta en valor dun recurso endógeno, como o auga mineral.



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

O feito de que o convenio sexa realizado co Clúster é a mellor canle para atender ás necesidades demandadas polo conxunto das empresas configuradas no seno das mesmas, xa que o Clúster aglutina ás dúas Asociacións representativas deste sector. Así para os efectos do establecido no artigo 19.4 a) da Lei 9/2007, do 13 de xuño de subvencións de Galicia, consta nominativamente nos orzamentos xerais da Comunidade Autónoma de Galicia para o ano 2016 a aplicación orzamentaria orzamentaria 09.20.734A.781.4, para o seu financiamento.

TERCEIRA.- OBRIGAS DA ASOCIACIÓN CLÚSTER DO AUGA MINERAL E TERMAL DE GALICIA

O Clúster asumirá o deseño da marca distintiva “Auga Mineral de Galicia” e o desenvolvemento da aplicación "Terras da Auga".

Así mesmo, o Clúster deberá cumprir coas seguintes obrigas:

- A. Entregar á Dirección Xeral de Enerxía e Minas da Consellería de Economía, Emprego e Industria unha memoria das actividades realizadas.
- B. Destinar o importe do financiamento do presente convenio ao obxecto e finalidade que indicados no mesmo no período comprendido entre o 1 de xaneiro de 2016 e o 30 de novembro de 2016.
- C. Comunicar á Consellería de Economía, Emprego e Industria a obtención de subvencións e axudas para a mesma finalidade que a do presente convenio, procedentes de calquera outra Administración Pública ou de entes públicos ou privados, nacionais ou internacionais.
- D. Facer constancia expresa da colaboración da Consellería de Economía, Emprego e Industria, incluíndo a imaxe corporativa institucional que esta lle facilite, en toda información e publicidade da actividade obxecto do convenio, difundíndoa de maneira axeitada e situándoa en lugar destacado e visible, de maneira suficientemente perceptible. Incluir igualmente a promoción da “Marca Galicia” nas actuacións obxecto do presente convenio de colaboración.
- E. Proceder ao reintegro, total ou parcial dos fondos percibidos e dos xuros de demora correspondentes dende o momento do pagamento da subvención ata a data na que se acorde a procedencia do reintegro, nos supostos previstos no artigo 33 da Lei 9/2007, do 13 de xuño de subvencións de Galicia.
- F. Facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas, no exercicio das funcións de fiscalización e control do destino das axudas.
- G. A marca distintiva das augas minerais de Galicia poderá ser utilizada por todas as entidades de envasado de auga mineral e balnearios de Galicia que cumpran os requisitos establecidos no seu desenvolvemento. Polo que respecta a ferramenta no sistema operativo Android e Ios “Terras da Auga” será accesible para todo o público de xeito gratuíto.
- H. As obrigas recollidas no artigo 11 da Lei 9/2007, de 13 de xuño de subvencións de Galicia.



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

A sinatura do presente convenio comportará a autorización do beneficiario á Consellería de Economía, Emprego e Industria para solicitar as certificacións que deban emitir a Axencia Estatal da Administración Tributaria, a Tesouraría Xeral da Seguridade Social e a consellería competente en materia de facenda da Xunta de Galicia segundo o establecido no artigo 20.3 da Lei 9/2007, do 13 de xuño, de subvencións de Galicia. Non obstante, o Clúster poderá denegar expresamente o consentimento, debendo presentar entón a certificación nos termos previstos regulamentariamente.

CUARTA.- OBRIGAS DA CONSELLERÍA DE ECONOMÍA, EMPREGO E INDUSTRIA.

A Consellería de Economía, Emprego e Industria financiará os gastos que xeren as actividades obxecto do presente convenio sinaladas na cláusula anterior ata un máximo de SESENTA MIL EUROS (60.000,00 €) IVE incluído, con cargo á aplicación orzamentaria 09.20.734-A.781.4 “Clúster da Auga. Creación marca Auga mineral” dos orzamentos xerais da Comunidade Autónoma para o ano 2016.

A distribución do orzamento é a seguinte:

CONCEPTO	IMPORTE
C.O.M.G.: Elaboración manual interno uso da marca (informe requisitos, grado cumprimento normativa sectorial,...).	3.327,50 €
Empresa marketing: Deseño marca e elaboración manual identidade corporativa.	14.520,00 €
Empresa publicidade: publicidade da marca en medios especializados.	4.840,00 €
Empresa comunicación: Deseño e posta en marcha dun plan de comunicación da marca.	2.420,00 €
Empresa tecnolóxica: Desenvolvemento de "Terras da Auga" en Android.	11.797,50 €
Empresa tecnolóxica: Actualización versión app iPhone + contidos web´s "Terras da Auga" + mantemento actualización versións.	5.868,50 €
Empresa comunicación: Creación e actualización de contidos para Terras da auga.	7.199,50 €
Acto presentación da marca e de Terras da Auga.	1.210,00 €
Equipamentos tecnolóxicos.	2.541,00 €
AGAMIN: Gastos de persoal propio dedicado al proxecto.	6.000,00 €
Gastos fixos imputados ao proxecto.	276,00 €
TOTAL	60.000,00 €

Calquera modificación das cláusulas do presente convenio deberá ser solicitada á consellería, quen decidirá sobre a súa procedencia, e no caso de aceptarse se levará a cabo á súa formalización mediante a correspondente “addenda”, consonte ao artigo 35 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

Sen prexuízo do anterior e sen necesidade de instar procedemento de modificación de subvención, poderanse aceptar variacións nas partidas de gasto do proxecto subvencionado coa limitación do 10 %, sempre que non aumente o importe total do gasto aprobado e que non se desvirtúen as características do proxecto.

No caso de que o investimento realizado teña un custo inferior ao inicialmente previsto e sempre que isto non supoña unha realización deficiente da totalidade do proxecto, a contía da subvención reducirase proporcionalmente, manténdose constante a porcentaxe da axuda respecto ao custo total do investimento

QUINTA.- SUBCONTRATACIÓN DAS ACTIVIDADES SUBVENCIONADAS.

A subcontratación dos servizos necesarios para acometer as actividades a desenvolver ao abeiro do presente convenio poderá acadar ata o 100 % das mesmas, e realizarase de acordo aos límites e obrigas establecidos no artigo 27 da Lei 9/2007, de 13 de xuño, de subvencións de Galicia e no artigo 43 do seu regulamento. En todo caso, a Consellería de Economía, Emprego e Industria poderá comprobar, dentro do período de prescrición, o custo así como o valor de mercado das actividades subcontratadas.

De conformidade co apartado 3 do artigo 27 da Lei 9/2007, de 13 de xuño, cando a actividade concertada exceda do 20 % do importe da subvención e o dito importe sexa superior a 60.000 € a subcontratación deberá cumprir os requisitos seguintes:

- que o contrato se celebre por escrito.
- que a celebración do mesmo se autorice previamente pola Consellería de Economía, Emprego e Industria.

A entidade beneficiaria non poderá concertar a execución total ou parcial das actividades subvencionadas con empresas ou persoas vinculadas coa entidade solicitante, agás que concorran as circunstancias previstas no artigo 27.7 d) da Lei 9/2007, do 13 de xuño.

No caso de que a entidade beneficiaria reúna os requisitos previstos no artigo 3.3 b) do Real decreto lexislativo 3/2011, do 14 de novembro, polo que se aproba o texto refundido da Lei de contratos do Sector Público, terá consideración de poder adxudicador, e polo tanto, deberá someterse á disciplina de contratación pública nos termos previstos no devandito texto normativo.

SEXTA.- MODOS DE PAGAMENTO.

De acordo ao establecido no artigo 63 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, poderase realizar un pagamento anticipado de ata un 50 % da subvención concedida, con carácter previo á xustificación, como financiamento necesario para poder levar a cabo as actuacións inherentes á subvención. A concesión do anticipo realizarase mediante resolución motivada, previa solicitude do beneficiario.

No caso de que o pagamento do anticipo supere os 18.000 euros, o beneficiario deberá constituír a correspondente garantía, nos termos do establecido no artigo 67 do Decreto 11/2009 do 8 de xaneiro.



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

O segundo pagamento polo importe restante do anticipado, realizarase unha vez xustificada a realización das actuacións descritas na cláusula terceira, na forma e cos requisitos previstos na cláusula oitava.

SÉTIMA.- INCOMPATIBILIDADE CON OUTRAS SUBVENCÍONS.

O financiamento das actuacións obxecto do presente convenio por parte da Consellería de Economía, Emprego e Industria será incompatible con outras subvencións, axudas, ingresos ou recursos para a mesma finalidade, procedente de calquera administración ou ente público ou privado, nacional, da Unión Europea ou de organismos internacionais, a menos que as posteriores axudas se destinen a unha ampliación ou mellora da actividade subvencionada e sen que en ningún caso se rebase o custe.

OITAVA.- PRAZO E FORMA DE XUSTIFICACIÓN.

A data límite para a presentación da correspondente xustificación da realización das actividades do presente convenio será o 30 de novembro de 2016. Admitiranse os xustificantes de gastos realizados dende o 1 de xaneiro de 2016 ata o 30 de novembro de 2016.

A xustificación da subvención por parte do beneficiario realizarase mediante a achega da seguinte documentación:

A. Certificación do órgano que teña atribuídas as facultades de control da toma de razón en contabilidade do cumprimento da finalidade do convenio e da aplicación dos fondos destinados para tal efecto.

B. Declaración responsable do rendemento da conta xustificativa segundo o modelo recollido no Anexo I do presente convenio que inclúa o seguinte:

1. Memoria de Actuación xustificativa do cumprimento do obxecto do convenio. Presentarase un informe final detallado con indicación das actividades realizadas para o seu desenvolvemento, indicando o grao de cumprimento respecto ao planificado e os resultados obtidos, no seu caso, achegarase un exemplar dos estudos ou proxectos elaborados, así como calquera entregable, material gráfico, folleto ou fotografías que se obteña no desenvolvemento de cada actividade. Así mesmo deberá acreditarse o financiamento da Dirección Xeral de Enerxía e Minas.

2. Unha Memoria Económica xustificativa do custo das actividades realizadas por cada un dos traballos obxecto do convenio que conterà:

a. Unha relación clasificada dos gastos e inversións da actividade, con identificación do acreedor e do documento, o seu importe, data de emisión e data de pago. Esta táboa virá asinada e selada polo responsable da entidade. A relación de gastos figurarán por orde cronolóxica (ademais do formato papel entregarase formato dixital –folla de cálculo- de acordo aos modelos establecidos no anexo).



b. Orixinais ou fotocopias compulsadas dos documentos acreditativos do investimento ou actuación consistentes en facturas dos provedores ou documentos de valor probatorio equivalente:

Os documentos de gasto ordenaranse seguindo a mesma orde que a indicada na relación clasificada dos gastos.

As facturas e xustificantes de gasto deberán reunir os seguintes requisitos, de acordo co establecido no Real Decreto 1619/2012 relativo ás obrigacións de facturación:

- Deberá poder identificarse de forma clara o número da factura e a súa data de emisión.
- Deberá identificarse correctamente tanto o destinatario dos bens ou servizos como o obrigado a expedir a factura, incluíndo as súas correspondentes razóns ou denominacións sociais, números de identificación fiscal e domicilio.
- O concepto da factura deberá ser claro e relacionado coa actividade subvencionada, describindo as operacións e a data de realización das mesmas.
- No caso das subcontratacións o documento xustificativo ou factura deberá facer referencia á actividade ou tarefas subcontratadas no marco do proxecto en cuestión.
- Deberá poderse identificar o tipo impositivo ou tipos impositivos aplicados ás operacións.
- Finalmente, deberá poderse identificar a cota tributaria repercutida, que deberá consignarse por separado.

En calquera caso, o importe xustificado de cada factura será o valor total da mesma sen IVE. Para poder incluír o IVE como gasto financiable, o beneficiario deberá presentar o correspondente Certificado de estar exento do pago do IVE.

Se as facturas están en idioma distinto do galego ou español, deberase achegar tradución da descrición do servizo, subministración ou outro tipo de gasto que corresponda, debéndose axustar as facturas aos requisitos que esixa a lexislación de cada país estranxeiro.

Para a xustificación dos gastos de persoal deberá achegarse:

- Para as retribucións: Nóminas e contratos de traballo.
- Para as cuotas da Seguridade Social: Modelos TC1/ TC2 da TGSS. Se sinalarán no documento as liñas correspondentes aos traballadores que imputan horas ao proxecto.
- Xustificación bancaria do pago das nóminas e do pago da Seguridade Social.
- Para a imputación das horas: Unha certificación asinada e selada polo responsable da entidade, na que conste: nome e apelidos do persoal, posto de traballo que ocupa na entidade, tarefa que desempeñou relacionada coa



actividade subvencionada, número de horas adicadas, custo hora e importe total imputado.

O custo hora calcularase do seguinte xeito:

$$\text{Custo/hora} = (X+Y):H$$

X = Retribucións íntegras satisfeitas ao empregado, de acordo co declarado no modelo 190 do IRPF ou nóminas e contrato. Neste concepto non se inclúen importes correspondentes ás dietas.

Y = Cuota patronal anual satisfeita á Seguridade Social polo traballador, calculada aplicando á base de cotización expresada nos modelos TC2 debidamente identificada multiplicada polo coeficiente final resultante de la aportación do beneficiario á Seguridade Social por ese empregado.

H = Horas anuais do empregado segundo o convenio de aplicación ao beneficiario.

No tocante aos gastos de viaxe (máximo dúas persoas) considerarase como gasto máximo por desprazamento, realizado a través de autobús, tren ou avión, o importe do billete. Os gastos máximos por aloxamento e manutención serán considerados nas contías establecidas para o persoal funcionario, no Anexo II, Grupo 2, do Decreto 144/2001, de 7 de xuño de indemnizacións por razón do servizo ao persoal con destino na Administración autonómica de Galicia

Estes gastos xustificaranse mediante a presentación da seguinte documentación acreditativa:

- Os gastos de aloxamento e manutención xustificaranse mediante o documento de liquidación de dietas, podendo utilizar o modelo que aparece no Anexo e debendo presentar a correspondente factura expedida polo establecemento hostaleiro ou pola axencia de viaxes. Non serán obxecto de subvención os gastos extraordinarios como os de teléfono, minibar, etc
- Os gastos de desprazamento xustificaranse mediante documento de liquidación de dietas e gastos, detallado igualmente no Anexo, acompañado en todo caso dos correspondentes billetes e factura da Axencia de Viaxes.
- No caso de que se utilizaron os servizos dunha axencia de viaxes, deberase presentar, ademais da factura da mesma (na que se especifique o número de persoas e días de estancia, así como os conceptos obxecto do gasto: transporte, aloxamento, etc.) as facturas individuais ou colectivas dos establecementos hostaleiros ou documento acreditativo da prestación do servizo, así como os títulos de transporte para o mesmo fin.
- Cando as facturas sexan colectivas, presentarase a correspondente certificación da entidade na que conste o nome e relación coa entidade dos usuarios.



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

Serán subvencionables os custos indirectos correspondentes ao período comprendido entre o 1 de xaneiro de 2016 ata o 30 de novembro de 2016, sempre que estean relacionados coa actividade subvencionada e sexan indispensables para a adecuada preparación ou execución da mesma. Os custos indirectos serán proporcionais ás horas imputables ao proxecto respecto do número de horas totais do persoal da entidade beneficiaria, para o período no que se realice a actividade subvencionada. Para a súa xustificación presentaranse os xustificantes de gasto e de pago correspondentes. O IVA correspondente aos gastos incluídos no sumatorio de custos indirectos será elixible unicamente no caso de que sexa real e definitivamente soportado polo beneficiario final ou destinatario último.

Cando o importe do gasto subvencionable supere as contías establecidas no Real decreto lexislativo 3/2011 de 14 de novembro, polo que se aproba o texto refundido da Lei de contratos do Sector Público, para o contrato menor, o beneficiario deberá solicitar como mínimo tres ofertas de diferentes provedores, con carácter previo á contratación do compromiso para a obra, a prestación do servizo ou a entrega do ben, salvo que polas súas especiais características non exista no mercado suficiente número de entidades que as realicen, presten ou subministren ou salvo que o gasto se tivese realizado con anterioridade á solicitude da subvención.

A elección entre as ofertas presentadas, que deberá achegarse xunto coa xustificación, realizarase conforme aos criterios de eficacia e economía, e no suposto de non recaer a adxudicación na proposta económica máis vantaxosa, deberán achegar unha memoria na que se xustifique expresamente a elección do adxudicatario do contrato.

c. Orixinal ou copia compulsada da documentación bancaria dos pagamentos (excepción feita daqueles documentos dos que a empresa non custodia os orixinais -cheques-). Presentarase adxunto a cada documento de gasto o seu correspondente documento de pagamento e o extracto bancario onde figure o cargo correspondente.

No caso de que exista un mesmo documento de pagamento para varios documentos de gasto, fotocopiarase o documento de pagamento tantas veces como documentos de gasto aos que se faga referencia, e achegarase a cada un dos documentos de gasto unha copia do devandito documento de pagamento.

Non se admiten os pagamentos en efectivo.

Os xustificantes bancarios de pagamento deben coincidir exactamente co importe da factura, IVE incluído. No caso de que o importe reflectido no documento bancario non coincida co importe do documento de gasto (pagamento agrupado), deberase remitir un detalle dos pagamentos efectuados onde se poida identificar o documento de gasto en cuestión.

C. Xustificante das axudas obtidas ou declaración das solicitadas ou que se prevé obter para o mesmo investimento en calquera outra administración, entes públicos ou privados, nacionais ou internacionais; indicando a súa contía.

D. Copia compulsada do último recibo do I.A.E, cando o beneficiario deba estar dado de alta no imposto de actividades económicas. No caso de que o beneficiario fose suxeito pasivo do IAE pero estivese exento do pago deste tributo, aportará declaración responsable na que se



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

fagan constar tales circunstancias. Por último, cando o beneficiario non estea suxeito á citada obriga tributaria aportará declaración responsable na que figure que non está suxeito a dito imposto.

E. Certificado relativo á situación do beneficiario con respecto ao imposto sobre o valor engadido (IVE).

F. A Consellería de Economía, Emprego e Industria solicitará telemáticamente as certificacións para a comprobación da situación do Clúster con respecto ás obrigas tributarias e coa Seguridade Social e de non ter débedas pendentes por ningún concepto coa Comunidade Autónoma de Galicia nin coa Administración do Estado, de acordo co establecido no artigo 31.7 da Lei 9/2007 de Subvencións de Galicia.

Transcorrido o prazo establecido de xustificación sen que o Clúster presentase a documentación solicitada, a Consellería de Economía, Emprego e Industria requirirá ao beneficiario para que no prazo improrrogable de dez días a presente. A falta de presentación da xustificación no prazo indicado comportará a perda do dereito ao cobramento total ou parcial da subvención e demais responsabilidades establecidas na Lei de subvencións de Galicia. A presentación da xustificación no prazo adicional establecido neste apartado non eximirá ao beneficiario das sancións que conforme á Lei correspondan.

A Consellería de Economía, Emprego e Industria resérvase o dereito de solicitar toda a documentación que considere precisa, en relación coa xustificación do cumprimento do obxecto do convenio.

NOVENA.- CONTROL.

A Consellería de Economía, Emprego e Industria poderá levar a cabo as actividades de inspección que considere oportunas para controlar o cumprimento da subvención.

Alén do anterior, as subvencións estarán sometidas á función interventora e de control financeiro exercido pola Intervención Xeral da Comunidade Autónoma, nos termos que establece o título III da Lei 9/2007, do 13 de xuño de subvencións de Galicia. Así mesmo, estará sometida ás actuacións de comprobación previstas na lexislación do Tribunal de Contas e do Consello de Contas.

DÉCIMA.- PUBLICIDADE.

O Clúster consinte expresamente o tratamento necesario dos datos relevantes deste convenio e a súa publicación na páxina web da Consellería de Economía, Emprego e Industria e no Diario Oficial de Galicia, coas salvedades previstas no artigo 15.2º d) da Lei 9/2007, do 13 de xuño, de subvencións de Galicia.

Do mesmo xeito, de acordo co establecido na disposición adicional primeira do Decreto 132/2006, do 27 de xullo, de creación dos rexistros de axudas, subvencións e convenios e de sancións da Xunta de Galicia, consinte expresamente a inclusión e publicidade dos datos relevantes referidos, no devandito rexistro.

DÉCIMO PRIMEIRA.- COMISIÓN DE SEGUIMIENTO.

Para o desenvolvemento e bo fin deste convenio constituirase unha comisión paritaria de ata un máximo de catro membros, que velará polo cumprimento das obrigas das partes e adoptará



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

cantas medidas e especificacións técnicas sexan precisas de cara a garantir a boa execución do convenio.

A súa actuación axustarase ao establecido na Lei 30/1992, de 26 de novembro, de réxime xurídico das administracións públicas e do procedemento administrativo común e na Lei 16/2010, de 17 decembro, de organización e funcionamento da administración xeral e do sector público autonómico de Galicia.

DÉCIMO SEGUNDA.- CONFIDENCIALIDADE.

As partes que interveñen comprométense a manter a confidencialidade de toda información facilitada entre elas e que teña o dito carácter.

DÉCIMO TERCEIRA.- RELACIÓN CONTRACTUAL.

Este convenio non supón asociación algunha ou dependencia entre as partes asinantes, que actuarán de xeito absolutamente independente e autónomo, sendo obrigación específica e exclusiva de cada parte cumprir con cantas obrigas legais lle correspondan no desenvolvemento da súa actividade.

Deste xeito, a subscripción do presente convenio non comportará relación laboral, contractual ou de calquera outro tipo entre os profesionais que desenvolvan as actividades e a Xunta de Galicia, de tal xeito que non se lle poderá esixir responsabilidade algunha directa, indirecta ou subsidiariamente polos actos ou feitos acaecidos no desenvolvemento do mesmo.

DÉCIMO CUARTA.- VIXENCIA.

Este convenio entrará en vigor ao día seguinte da súa sinatura, terá vixencia ata o 30 de decembro de 2016 e financiará gastos correspondentes ás actuacións desenvolvidas dende o 1 de xaneiro de 2016.

DÉCIMO QUINTA.- RESOLUCIÓN

Serán causas de resolución do presente convenio procedendo ao reintegro, total ou parcial, da axuda percibida e dos xuros de demora correspondente dende o momento do pagamento da subvención ata a data na que se acorde a procedencia do reintegro, as determinadas no artigo 33 da Lei 9/2007, do 13 de xuño.

En especial, son causas de resolución do presente convenio as seguintes:

- A desviación dos fondos outorgados para outra finalidade distinta da sinalada neste convenio.
- incumprimento da obriga da xustificación do investimento realizado.
- incumprimento de calquera outra das cláusulas establecidas no mesmo.
- transcurso do tempo estipulado sen que se desenvolva o mesmo.
- acordo mutuo das partes.

DÉCIMO SEXTA.- NATUREZA E RESOLUCIÓN DE CONFLITOS.

O presente convenio ten carácter administrativo. Correspóndelle ao conselleiro de Economía, Emprego e Industria a interpretación, modificación, resolución e nulidade do mesmo e a



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA

Dirección Xeral de Enerxía e Minas

galicia

resolución das dúbidas que xurdan sobre o seu cumprimento, sendo os acordos tomados neste sentido inmediatamente executivos. Asemade, derivada da súa relación de entidade subvencionadora, correspóndelle tamén ao conselleiro a potestade de acordar o reintegro das cantidades percibidas. As posibles cuestións litixiosas serán de coñecemento e competencia da orde xurisdiccional contencioso-administrativa de conformidade coa Lei reguladora de dita xurisdición.

DÉCIMO SÉTIMA.- SUPLETORIEDADE.

O presente convenio queda excluído do ámbito de aplicación do Real decreto lexislativo 3/2011 de 14 de novembro, polo que se aproba o texto refundido da Lei de contratos do Sector Público, en virtude do establecido no seu artigo 4.1, sen prexuízo da aplicación dos principios do devandito texto normativo para resolver as dúbidas e lagoas que puideran presentarse.

O presente convenio rexerase polas súas propias cláusulas e en todo o non recollido nelas aplicárase o disposto para esta materia na Lei 9/2007, do 13 de xuño, de subvencións de Galicia, no seu regulamento aprobado no Decreto 11/2009, do 8 de xaneiro e demais normas de dereito administrativo.

Lido polas partes, por si mesmas, e como proba de conformidade co expresado no presente convenio, asínano e rubrícano por triplicado exemplar, no mesmo lugar e data que se indica no comezo.

POLA CONSELLERÍA DE ECONOMÍA,	POLO CLÚSTER DO AUGA
EMPREGO E INDUSTRIA,	MINERAL E TERMAL DE
	GALICIA,

D. Francisco Conde López